

SONAJING

(KA·SAAN' GIT)

CHU·GIMIK GOLPO

By

B. S. Bangshall

SONAJING

(KA·SAAN' GIT)

CHU·GIMIK GOLPO



By

B. S. Bangshall

Published by
Mrs. Sunilla G. Momin
Bonepa A-tilla, Tura

First Edition - 2010
1,000 Copies

Copyrights Reserved

Rs. 35.00

Printed at :
Eeu Dee Printers
Nakam Bazar, Tura
West Garo Hills, Meghalaya

AGANSOANI

A·chik golpo mingsako bikote sena nangnike aro gisiktang sike anga ia “Sonajing” minggipa golpoko seaha. Ua golponi skanggipa bakko 1958 bilsio aro gnigipa bakko 1964 bilsio chapa ka·ataha. “Sonajing” ki·tapa gimik ka·saani bidingo segimin golpo ong·ani gimin ua ki·tapni minggipin bimungko “Ka·saani Git” ineba mingaha.

Ua golpoko A·chikrangni janggi tangani bewal, niam, maniani aro changa-sapanirango pangchakesa anga seaha. Skangni salrango A·chikrangni janggi tangao dongchapgipa bewalranga matcha·pil·a, sam·kal·a, a·kim·gaa, gando·makkal·pala, bobil·dinga, chrok·mesaa aro katta·agana ba katta·ring·arangan ong·a. Da·ororoba A·chikrang gitrangko namnikgipangrang ong·a. Uni gimin “Sonajing”-ni golpo gimikkon ku·marapo donesa seaha. Ua kitapni je apsan pod·koba ‘direng’-ni, ‘gonda’-ni, ‘harara’-ni, ‘serejing’-ni, ‘nanggorere’-ni, ‘himangai’-ni, ‘aiao·aiao’-ni aro ‘boel’-ni sulrangchiba ring·na man·a. Iaragara A·chikrangni man·batelaigipa sulrang ong·a, aro ku·marapo katta·rikanirang ua sulrangna namedake ma·gapon uarango aiao inmangipa sul·salanirang inesa aganna man·aia.

Ia chonbegipa kitapde “Sonajing” Bak I, Bak II aro Bak III-oni golpo gimikko man·gope ku·akmao ba aganbewalo kandike segiminsa ong·a. Indiba “Sonajing” Bak I, Bak II aro Bak III-ko dakmesokani gita seahani gimin, badiaba badiaba bakrangko nanga gita taridape, sikode dakmesokna jakkalna man·a.

Ia “Sonajing” golpoo jakkalgipa manderangni aro biaprangni bimungrang gimikan bikote segiminsa ong·a, aro banoba aro basakoba indakgipa apsan bimungrang dongode uan maibakai ong·tinggrikanisan ong·aigen, indiba apsan mingtinggrikgipa manderangko aro biaprangko mangsongja.

Sena·jotna changpajaoba aro A·chik·ku·o indakgipa seanirang donggenchimoba, A·chikni kam, gisik, dakbewal aro changa-sapanirangko seachi parake donangpana mangsonge “Sonajing” golpoko bikote seaha.

Tura, Garo Hills
December 17th, 1985.

Ki·tap-segipa
(B.S. Bangshall)

SONAJING

(KA·SAAN' GIT)

CHU·GIMIK GOLPO

BAK I

Adita skang chasongo mingsinggipa badiaba A·chik song damsa dongachim. Ua songa balsrisri balwa nanggipa apalbegipa a·bri patal kosako dongani gimin aro pang·sangsang niwate rona niwattobeani gimin namen an·sengbeachim. Ua songo nokking jelbea, aro nokachik nokrangko wa·a bolchisa rikaioba mangrake aro nitobee song ni apalgipa sarani samtangtangchi riting riting dake aro nokantikong sarachipakna mikkanggrike rikachim. Panterangni nokpanteara jang·ki chubee tang·doe nokmikkangni krong aro bilbangrango bimangrangko sol·e·kite te·jangjang kimjimjim chanangbee songni kosakchipak rikgimin songko mikkim chaatachim.

Ua songni a·kongchipak grikbegipa chiring dilsaoniko chidare pongnsi sala gnan, aro songni sepang salaramchipako dal·gipa chibima dilsaba gnanachim. Song a·bri patal kosako ong·oba te·gatchu, te·brong grim grim dake songko ka·sinatan baksa nitoatachim. Ua songo pante·nomilrang jelachim, aro attamrango nomilrang nok mikkang sarao mi su·ronga aro panteranga jajong teng·ao sue·goe kal·susarongachim. Aro ua songara songgimikan chi·jengjeng rongtalbegipaba ong·achim.

Ua songni manderanga A·chik pagitchamrangni maniani niam aro dakbewalrango janggi tanggiparang ong·a aro uamangni ku·mong·nangrimgrikanirang mangrakbeachim. Uamangni gisepo bilakgipawa·sagipa, chalang·matgrik, goera·ka·grak, changgipa·sapgipa, gro·jerakgipa aro A·chik katta man·giparangba dongachim. Aro ua songan Balsrigittim minggipa song ong·a.

Ua songo saksa nambegipa nomil donga, aro uko nambegipa inesan aganna man·aigenchim. Uan gisik seng·gipa, namnama gun gnannggipa, nitobegipa aro ka·saanian gapgipa A·chik me·tra saksa ong·achim. Mandeni mikkang·bimang nitoani baksa namnama gun gisik, kam aro cholon dongrongbrejachim, indiba ua me·trao iarang gimikan chu·soke donga aro uko Dakgipa·Rugipaan dingtangmancha pattiate watataha gita nikpilaiachim. Uan Sonajing minggipa ong·a.

Balsri gittim songoni salpaksani ramao Dingram Gitok minggipa songba donga. Ua songo saksa chananggipa, gisik seng·gipa aro bil·bilakgipa Balseng minggipa panteba dongachim. Indiba uan rasong gripagipa aro

kangal cholgri ong-e atchigipasa ong-achim. Balseng-ni chonmitingon uni pagipade boloni ga-ake siangaha. Balseng-ni ma-gipara segipani siani ja-mano Boldam Songgital minggipa songgipinchina Balseng-ko rime katdilandaha. Ua songo dongmitingo duk ong-e janggi tangna nange aro sianggipa setangna kalime Balseng-ni ma-gipaba siangaha. Ma-gipani siani ja-mano Balseng an-tangni atchiram Dingram Gitok songchi saksan brangangaha. Atchiram songtangoba uni ma-de-ma-jong nangarangba dongjahachim. Uni gimin ua songni saksa mandeo dongnapeaha. Aro unon Balseng pante sokaha.

Changsao, Robibal salo attamgrochipak a-ba ramajoljol roampana ine Balseng ong-katangpaaha. Unomitingo sam-bolrang ritimbamiting ong-ani gimin a-barango rona an-sengbeachim. Balseng a-ba rama sambao rong-te kosako asonge sam-bibalrangko nie ropaengachim. Tiktak ua somoio maibakai manchisoa gita Sonajing-ba a-ba ramarango niwate ropana re-baaha, aro indake re-baon adita chel-aonin Balseng-ko nikate uchipaknan ramajoljol re-angaha. Balseng-de uko niksojaengachim, indiba sepangona soko samcheng gam-ana niaton Sonajing-kosa del-dikdik ua nikaha. Unon Sonajing-de kratcha-e re-joljolangengachim indiba Balseng uko sing-e nirikaha.

Balseng aro Sonajing, uamang saksa sakgipinko u-igrikengachim, maina chonmitingo Balseng-de Balsrigittim songchi roangrongachim. Indiba da-o uamang sakgnian pante-me-tra sokosa gronggriktaiaha. Uni gimin uamang kratcha-a gnanng u-igrikkuja gitasa agangrikchengaha, aro saksa sakgipin-ni bimungrangko sing-grikchenga dakesa agangrikna a-bachengaha.

Uamang sakgnian gisik sram-sram, saksara sakgipin-na bate bate chol-et-rongret kattarangko ma-rap ma-rap agangrike A-chik sulrangchiba ring-joljole roaha. Unon uamang an-tangtangni chonmiting salrangni gimin saksa wet saksa wet dake agangrikaha. Unikoa nitoani, mikchaani aro ka-saani bidingrangoba uamang gisik seng-bee agangrikroangaha. Uamang sakgni-ni chanchiani aro u-ianirangba apsan apsan ong-aiachim. Indake agangrike roangon aditani ja-mano attam salniangaha. Unon an-tangko nokchi-songchi re-dilatchina Sonajing Balseng-ko mol-molaha. Balseng adita jechaka dake rongret-cholet aganani ja-mano Sonajing-ko uni songchi re-dilatangaha.

Balseng aro Sonajing attam salnio a-ba ramako re-angon rama noksik gonggerango wa-grip salakkim andalsimsim dakengachim. Indakgipa biaprangko uamangni re-angmitingo matcha dal-gipa mangsa rong-ma mittino dongsoe randingataha, aro uamangni jajamitingo uamangko chagopaha. Unon Balseng aro Sonajing jagok-jabrangari silang-dare rikam rikam a-ba rama joljol simang-tangmang katangaha. Indake katangon wa-jak bijako ga-soltapmane sakgnian a-kuang tu-beachi ga-akangjok aro Balseng-ni

jakasini ja-pako wa-chok datsima gita bu-aha. Gol-chong bu-gipako misil-misil okgalate, sam-bijakko matgipao sepdape aro gana-ba-ratangko chite Sonajing Balseng-ni mata-pariko katipataha.

Indiba matcha dal-gipa uamangko jaksiksrangna man-jaha. Unon attam walaha aro salaramchi jajong jarambong nabaaha. Ja-a saaoba Balseng gol-dik chane Sonajing-ko nokona soke re-dilangaha. Unoni an-tangtangna a-sel ong-ani gimin agangrikjoljole adita re-angani ja-mano songona sokna sepangon, Sonajing-de attam walahani gimin uni pagipa uko manengsogen ine kenengachim, aro maiba a-selko pa-sike tol-e aganna ine chanchiengachim. Indiba, jeba ong-china kakket kattakon aganaibo ine Balseng una aganaha.

Songona sokangon uamangko achak sing-soaha, aro Sonajing-ma-angni nok sepangona sokon noko Sonajing-ni ma-gipa-pagipani jegrikani ku-rangko uamang knaaha. Uamang te-brong ja-pango knatime nion, Sonajing-pa Sonajing-mako, Sonajing-ko saie-manenge nokoniko katata ine pote jegrikengachim, maina walona kingkingba uamang Sonajing-ko noko niksokujaengachim. Una skang changrangoba Sonajing-ma-gipa Sonajing-ko sai-manengrongachim. Indiba ua salode Sonajing-ma-gipa Sonajing-ko saia ba manenga dongpajachim. Uni gimin Sonajing ma-gipade raken jechakaha, Sonajing pagipaba batebate ka-o nangrorobaaha aro indaken uamang dokgriknasipilengachim. Unomitingo achakba Sonajing aro Balseng-ko chanapnape sing-engani gimin an-tangtangni jegrikana sing-engi ine chanchie Sonajing pagipa achak-ko ka-done dokna rikangaha. Unon Sonajing saraona ong-kate an-tangko pagipana mesoksoaha. Sonajing pagipa uko sandimiting somoio Sonajing-kosa re-baengako nikdike ua detangko mol-mole nokona rimbaaha. Unon Sonajing ma-gipa-pagipa demechikko niksoe ka-a be-a namgrikaha aro uamangni gisegrikarangba jripjrang namangpilaha.

Unon, bachi re-angenba attam walchipbana nangaha ine Sonajing pagipa demechikko sing-aha. Sonajing pagipani sing-ana aganchakna kenengachim, indiba pagipa ka-o nangjawa kakketko aganbo inani gimin Sonajing-ba kakket kattakon pagipana aganaha. Uni pagipa kakketko aganani gimin detangko namnike Balseng-ko nokona rimbachina Sonajing-kon watataha, aro uaba kusi ong-bee Balseng-ko jako sale nokona rimbaaha. Balseng-ko niksoon Sonajing-pa kusi ong-e rimchaksoaha, aro do-o doke mi song-e cha-dilchina ua Sonajing-na aganaha. Unikoa Sonajing-pa nokpanteni pante saksa Doenang minggipako okamate mi-cha-mano Balseng-ko nokpanteo tuchina rimechina gita una aganataha. Uni ja-mano Sonajing-pa an-tangde nokchi tuna re-angaha.

Mi song-na ine babilsiona re-ange chi basingko nion chide dongsrangjahani gimin chiring chidareoniko chi ko-ena nangaha. Indaken

ja·a saoba Balseng gol·dik chane wa·al nate Sonajing·ko chi ko·china chiring·chikolona re·dilandaha. Chigaoni sokbapile bikkik·bakbak srapsrap agangrikjoljole Sonajing mi·bijak song·aha. Mi·bijak song·mane Sonajing Balseng baksa damsan meattamko cha·aha. Mi cha·man·ringmane ua Balseng·ni ja·a mata pariko tariattaiaha aro unon Sonajing·pani aganatgipa Doenang minggipa pante re·baaha. Uan agan·bal·eke ka·dingatna changgipa pante saksa ong·achim. Nokona sokbana skangan “Mama Balseng dongama?” ine Balseng·ko okambajoljolesa ua re·baaha. Balseng·de Doenang·ko u·ikujachim, indiba Doenang·de skango Balsrigittim·chi Balseng·ni roangaonin uko u·iengachim.

Doenang Balseng·ko nokpantechi re·china rimon Balseng·de ja·a ga·e re·nan man·srangjahachim, maina pariko su·srange sam dpaton uni mata pari sabataha. Uni gimin Balseng·ko ba·tome rimangpachina Sonajing Doenang·ko aganaha maina ua ja·a ga·nan man·chongmotjaha ine u·iaha. Sonajing andap·pindapani ba·rarangkoba Balseng·na on·atengachim, indiba noggachi nokni ba me·chik·desani jakkala ba·ra·kancharangkode nokpantechi ra·napmalja ine uamang ra·angjaha. Unikoa, jeba ong·bo re·na man·chongmotjaenga ine nike, Doenang Balseng·ko janggilo ba·tome nokpantechi ra·angaha. Aro indake ekgrikangon walde waljatchi ong·angaha.

SONAJING

BAK II

Uamang Sonajing-pani sarako badee re·angmangmangon, Doenang Balseng-ko ba·toma gnangan kosakjoljol tang·doangaha, aro bachipakan bildoangenga ukoba uamang u·ijaha. “Maina angko ba·toma gnang do·o gita bilbitenga” ine Balseng-ni sing·on aganbal·ekna man·gipa Doenang “Anga an·tangde gisepo walo hile roronga, indiba an·tang saksande agre balbojengjeng Jakaia, sakgnisa nambata” ine aganchakaiaha. Indake ua Balseng-na ettale-mangkale aganchakoba Doenang an·tang manchaba mai ong·enga ba maikai Balseng-ko ba·bita gnang kosakjoljol tang·doangenga uko ua u·ijaha aro gisiktangode jajrengaha. “Da·oba nokpanteona sokkujama” ine Balseng-ni sing·on “baoni nokpantekosa janapengasai, nokpantekode da·sion an·chingde galbamanjok” inesan Doenang-de aganchakpaaijok. Indake waltongsa Balseng aro Doenang mamasaba ba·bita gnang bilangani ja·mano seng-nasiachibara biap damsao onchongtokeaha.

Uamangni onchokegipa ba ga·akegipa biapara Balsrigittim-oni adita chel·ao donggipa Ballinggiri minggipa songgipinsa ong·achim. Ua Ballinggiri songo namgijagipa aro samchi kal·ak-sinakna changgipa saksa buchuma donga aro ukon Jo·jengma ine mingsingachim. Balseng aro Sonajing-ni a·ba ramako re·bamitingo buring a·chang diltuao uamangko matcha dake kenatgipaba Jo·jengma-sachim. Uan matcha pil·e uamangko kenataha, maina uan matcha pil·naba changachim. Unikoa Doenang-ni Balseng-ko nokpantechi ba·tome rimangmitingoba Jo·jengma-de noktangon uamangko samni bilchi nikate aroba pil·sa sam·kal·aktaiaha, maina ua Balseng aro Doenang-ko an·tangni nokona sokbaatna mangsongaha. Indaken ua montro minge bilakgipa samgittangko sippodape balwao wataton Doenang Balseng-ko ba·bita gnang kosakjoljol tang·doange do·o bilbaa gita Jo·jengma-ni nok-mikkangona ba·bita gnang romrome sokangaha, aro unosa Balseng aro Doenang ba·bita gita nangkaprikaoni ma·ekgrike sakgnian sakprakprak skang gitan ong·taiaha.

Jo·jengma-o Norindik minggipa saksa demechik donga, aro Balseng-maangko sokbaatani mangsongania Balseng-ko demechiktang Norindik-na aro Doenang-koa an·tangna sam-mikmalchi malatna ine uni miksongani ong·achim. Indiba Balseng aro Doenang uni nok-mikkango ga·akon “Baoni panterangsa, mainasa nabaa sokbaa” ine u·ija dakesa Jo·jengma uamangko sing·soaha.

Balseng aro Doenang uni nokona sokbamangmangon Jo·jengma-de sruk-sruk Balseng-na sam-mikmal on·ataha, indiba gitik-gitak montroko mingaton Doenang-kosa mingsretatmanaha aro indakesa sam-mikmal Doenang-onange ua Norindik-na rang-san mikchaaha. Jo·jengma-ni miksonganide Balseng-ko samchi demechiktang Norindik-na malatna ba mikchaatna inesa ong·achim. Uamang katna man·jachina gitaba noksam wilwile samchi muni piaha. Unomitingo pringwalni somoi ong·achim.

Sam-mikmalko tarie watatani ja·man tapan Jo·jengma demechiktang Norindik-ko de-mesaaha. Norindik tusiaoni simakbae naringrotko ganjolari, knitangko doksate aro ba·ra chinpakjole chakatbaaha. Unon Jo`jengma Balseng-maangna mi-bijak song-e-rite on·china Norindik-na aganaha. Ua obostarangko nikon Balseng an·tangde pilakkon u·itokaha: chong·motan uamangko Jo·jengma sam kal·ake an·tangona sokbaataha aro sam-mikmalchi an·tangko Norindik-na malatna dakenga ine u·iaha. Indiba sam-mikmalde uo nangjaha ineba Balseng ui·aha. Indimangba samchi snaknaba donga ine kene Balseng Norindik-na mikchaa dakmike mesokaha. Da·nang Balseng-na minge on·gipa sam-mikmalara Doenang-osa nange uasa Norindik-na mikchaskaaha.

Jo·jengma alnama dakmike, Balseng aro Doenang-ko soka-chake, do·o doke mi song-e aro chu cheke on·simsimaha. Balseng iarang gimikkon ui·oba Jo·jengma sam-snakna kene Norindik-na mikchaa dake, chu peka dakmike, cha·e-ringe, chrok-mesae chakchike roangpaaha.

Attamsao Balseng aro Doenang chu-bitchi kanako ringe pektokaha. Balseng-de agre pekade ong·ja, indiba peka dake mesokna gita ua bawile chroke roaha. Unon uamang gimikan Balseng-ko ja·rike bawile chrokangtokaha. Indaken, Balseng-ni ki·sango Norindik, Norindik-ni ki·sango Doenang aro Doenang-ni ki·sango Jo·jengma dake riting riting bawile chrokangtokaha. Norindik-a Balseng-na mikchae uko ja·rike, Doenang-a Norindik-na mikchae uko ja·rike aro Jo·jengma-ra Doenang-na mikchae uko ja·rike nangsrapp nangsrapp wilwile riting dake chrokangtokaha. Uamang Balseng-ko ja·rike mikchaatangtangko nangchapchape dawilwil chrokon nina nitopilaha aro skanggipa Balseng-de ja·manbatgipa Jo`jengma-ko ritingode ja·rika gita ga·akskaaha.

Aditani ja·mano Balseng chrokako dontongon Norindik uko gondaserejing doke rodilaha. Unomitingo Jo·jengma-ba Doenang-ko wal·timo asonge kore doke rodilskaaha. Doenang-ba Jo·jengma-ko kusi ong·atnamangmang am·boljako mil·am dake aro am·pok bolsako seppi dake ra·e grika dake roaha. Doenang-ni am·boljachi engdinge grika dakon Jo·jengma an·tango nangna kene rang-san jite katon wal·tim so·ani am·boljao ga·tingdelmane ua wa·alchi chikkipe ga·akangaha. Gantong dangrue so·ani

walsare dareripripo ga·akon Jo·jengma-kode ganchio so·a gita rang·san wal·sare cha·bake kamaha. Jo·jengma-ko bakkaban wa·aloniko salongkatahachim, indiba unon uko wakko-do·ko so·a gita wa·al kamanaha aro ua ku·gap·ku·gap dakari janggi galsrangaha.

Norindik ma·gipa Jo·jengma-ni siana una ka·a·be·e grapaha, aro Balseng aro Doenang·ba grapa dakmike mesokaha. Sam snakgipa ba jaknokgipa Jo·jengma siahani gimin uni samrang ke·jaha ba bo·oka gita ong·aha. Unon Balseng aro Doenang ua biaponi bakkaban katangaha. Uamang badia ramako songchina re·na nanga uko chanchigija je rama ja·kol nika ua gitan kattimangangaha. Pring seng·on dilsa rama bimongo uamang nadikeaha.

Balseng aro Doenang kathaani ja·mano Jojengma-ni noksamona matcha jinma re·baaha, aro uamangni dal·batgipa mangsade Jo·jengma-ni manggisiko chikkape balangaha. Unomitingde Norindik·de kenen sibokpilahachim, indiba ua dikdiksani gisepon chakate uanoni simang·tangmang katangaha.

Balseng aro Doenang rama nadikgipa joljol katbae anti a·dam damsaona sokeaha. Ua antikoa Dimrim Patal Rimrim Anti mingachim, aro ua salara antini sal ong·achim. Uan chengo pagitchamrangni chasongo anti atgipa gita cha·gipa anti ong·achim. Ua antio A·chikrang ta·ma, e·ching, kil, sim·pak, laha aro reseginrangko chong·do·chong·doe palaha; aro Me·gam·Kotchurangara atte, gitchi, rikgitok, gando·makkal, gana·re·king, rang aro na·kamrangko dandak·dandak palaha. Unomitingo pilak bosturangkon dam sing·gija sikatangtang paisa on·ari ra·angtokaiachim. Una agreba ua antio dakgriksusae roani aroba me·chik·nomil nitobatgipako seokaniba dongachim. Balseng aro Doenang ua antiko cha·e pilak tamasarangko nie ropaengachim. Unon chibima rikamchipak an·cheng apalgipao manderangni jikjakani ku·rangko knae uama·ang uchina re·ange niaha. Unon, chibima rikamo niwataton, saksa mandeni gando makkal pale dakgrikna ra·biengako uamang nikataha. Ua mandea saksa me·apa del·dimdim dake dal·gipa Me·gam dakgrikragkipa ong·achim, aro ukoa Me·gam Gonggrot ine pilakchin mingsingachim. Ua A·chikrangko dakgrikna jaktong·ja·tong krenge ra·biatahaon A·chikrangoni saksaba uko dakgrikchakna pa·sokjahachim.

Ua Me·gam Gonggrot-ni chonike ra·bianiko Balseng chaknapjaha aro uni gimin uko dakgrikchakna chabaaha. Uamang siggrike, ja·tong·jaktong pe·grike dakgrikengon a·bachengode Balseng·kon ga·akatoba bon·kamaode Me·gam Gonggrot·ko Balseng amatsrangaiaha. Me·gam Gonggrot-ni ja·a samsa be·ahani gimin uni songoni manderangsa uko songchina chile ra·angaijok.

An·tangtangko amani gimin Me·gamrang mikkang antio ba changgipino A·chikrangko dakgrikna re·batainaba donga ine chanchie Balseng pilak A·chikrangko uamangko warachaksona tarie dongsochina agane

mikrakataha. Unon Balseng aro Doenang Rimrim antidamoni Balseng-ni songtang Dingram Gitok-chi re·pilangaha. Uamang songona sokna sepangon Norindik-ni sia dake tupenge dongsoako nikeaha. Unon Doenang uni dakmikako porikka nina ine ramasamo donggipa bolgongoni jong·su mangsako bolcheksio ra·bae Norindik-ni gitoko malataha. Jong·suko gitoko malaton Norindik-de rang·san chakate Balseng-maangko ja·rike katrikangaha, indiba uamang Balsrigittim ramako katanga dake rama dakgonggeao dongnurike ja·mano Dingram Gitok ramakon katbataiaha. Norindik-de uko u·igijasa Balsrigittim rama gitasa Balseng-maangko katrikange ua songonan sokangsrangaha.

Balseng aro Doenang-maangde Dingram Gitok songonasa sokbaskaaha. Songona sokbae dakgrikani silchidarerangko ba sel·u, mil·am, aro danilrangko tarisochina songantichinan Balseng aganattokaha, aro songsa songgipinchina indakgipa koborrangko watrikrikataha. Unon bang·bea A·chik songrangni manderangan an·tangtangni dakgrikani silchidarerangko antigimikan tarisotokaha. Aro songantini me·chik·desaranga dakgrikramo cha·ani·ringani ba merong·me·churangko tarisopaaha. Indake pilak dakgrikna tarianirangko matchoton antini salba sokbaaha.

Unomitingo Norindik-de ramajoljol katange Balsrigittim songona sokangskaaha. Songgipini a·gital nomil ua songona sokbaani gimin songoni me·chikrang uko chatimole nisoaha. Sonajing·ba re·bae an·tang baksa ripeng dake dongchina ine Norindik·ko rimangaha. Unon dakgrikna manchia sal sokahani gimin Sonajing·ba dakgrikako nipana ine dakgrikramchi re·na Norindik·ko ku·mongaha. Indiba uamang an·tangtangko dakjeesa me·asani gandingrangko gane·chinesea dakgrikramchi re·angaha. Sonajing an·tanga ku·ma ba boba dake aro Norindik·koa kala·nagok dakate me·asa gita tarie aro mil·am danilrangko ra·e uamang dakgrikramchi re·angaha.

Unomitingon Balseng aro Doenang·ba Dingram Gitok rama gita dakgrikramchina re·baengachim. Uamangko Sonajing aro Norindik del·dikdik ramao grongon saksara ku·ma aro saksara nagok dake ku·gap·mikjap dakarisa aganna man·ja aro agannako knaja dake uamang mesokaha. Indiba ua ku·ma·nagok dake me·asa gita dakjegiparanga Sonajing·mung Norindik·sa ine Balseng an·tangde u·iaha. Jeba ong·bo uamangni tamasarangko nichengkuna ine uamangni dakgrikramchina re·baaniko Balseng champengjaha.

Unon pilak songrangoni dakgrikna tarigimin bang·bea A·chikrang dakgrikani silchidarerangko ra·e ruechinchin sipai kotok gita dakgrikram biapona re·batokaha. Songo·nokode me·chik·desa aro budepa buchumarangkosan donbaaiaha. Balseng·ni ning·o A·chik kotokko dakgrikdilgiparanga Dilcheng, Basucheng aro Rong·dotpa·maang ong·achim.

Basucheng-koa bobil napbaram Dingram Gitok a-dokona donataha aro ua biapon bobilrangko rompedapsona ine dal-dalgipa rong-marangko tarie donsoaha. Rong-dotpa-koa samtangtangchi dakgrikgipa dolrangko dakgrikdilhina donataha, aro Dingcheng rakgipakoa janggilchini re-bikpile bobilrangko chagropna donataha. Balseng an-tanga dakgrikramo nikwattoa biapo dakgrikaniko dilna Doenang-ko rimbite dongaha.

Indaken uamang donatgimin a-damtangtango donge bobilrangni re-baaniko nichaksoaha. Ritcha-hajal bang-bea dakgrikna tarisogipa A-chik kotokrang jripjrang donge bobilko nisengsoaha. Indiba uamangni chanchisoa gita bobilrangni napbaani sal-somoi batangahaoba uamang bobilrangko niksojaha. Indiba Balseng pilak A-chik dakgrikgiparangkan simsaake aro mikrake dongsochina aganaha. Salni sal bobilrangko nisoe uamang aratangpilahani gimin mitamranga dakgriksusae, mitamranga bolko bimang sol-e-repe ba wa-dingchi do-kru-do-sing wate-chenge roaha. A-chik me-apa katta man-giparanga katta agane ba katta doke roaha, aro indaken bobil nichakmitingo sal-somoiko re-ataha.

Uandakmitingo, salsao, chibimao aue rona ine Doenang-de chibimachi re-angaha. Unon chikosakchi mande ku-rangko knae ua re-ange nion Sonajing aro Norindik-kosa nikataha, aro ku-ma-nagok dake me-asa gita dakjee rogi-paranga uamangsa ine unosa ua u-iaha. An-tangtangni dakjeaniko u-iahani gimin Sonajing aro Norindik kratcha-e katangaha, indiba Norindik-kode salrike rim-rikaha. Unon Sonajing-de songchina katjoljolangaha. Doenang-de Norindik-ko mikcha-namnike un baksa etal-mangkalgrike roaha. Unomitingo Sonajing Norindik-ko sengsooba niksojahani gimin uko am-na ine re-bapilaha. Uchi dakgrikramchiba Doenang-ko nikjani gimin Balseng-ba uko am-na ine re-angskaaha.

Unon Balseng Sonajing-kosa del-dikdik rama sambao nikeaha. Unomiting somoio dakgrik-dinggrikanina chanchiani donggenoba, dakgrikna skang bon-kame gronggrikna man-taiani gimin uamang pil-sade kusi ong-beaha. Indaken uamang ka-sagrikanu bidingrango aro pante-me-tra ong-oba maikai uarango u-ie ra-sona nanga uarangni giminba uamang sakgnian apsan apsan gisik gnangbee golpo ka-e roaha. Una agreba, a-songtang-chigatangna ka-saani aro dakna nanggni kamrangni bidingrangoba aro bobil dinggrik-dakgrikarangni giminba uamang gisik seng-bee agangrikaha. Indakmiting somoion Doenang-de dakgrikramchi re-bapilaha, aro Norindik-ba Balsrigittim-chi saksan katangaha.

Tiktak unomiting somoion dakgrikramchi jikjakanirangko aro nagra dokatako knaaha. Unon dakgrikramchide maiba ong-aha ba bobilrang sokbaaha ine chanchie, Balseng Sonajing-ko uni song Balsrigittim-chi re-dilanggalgale uko songo donbae, ka-sa-ka-sa ekgrikbae an-tangde dakgrikramchina ta-rake katbaaha.

SONAJING

BAK III

Balseng ta·rakbee katbae dakgrikramona sokna skang chubegipa bol pangsao gadoe dakgrikramchiko niwatataha. Unon bobilrang napbae A·chikrangko dakgriktokengaha ine nicate ua bakbakan boloni ong·one dakgrikramchi rang·san chabaaha. Ramao dakgrikramoni gong·rake katbaenggipa sakgni A·chikrangko ua nikdikaha, indiba uamangara Me·gam ba·rako gane an·tangtango Me·gamrang gita dakjeesa re·baengachim. Uni gimin dakgrikramchi mai ong·enga, aro uamanga maina an·tangtango Me·gam gita dakjee roenga uarangko bakbak aganchina Balseng uamango rang·rangari sing·aha. Uamaang kena gnang Balseng·na indake aganchakaha, “Dakgrikramni a·bao bobilrangko nisooba niksojani gimin aratpile A·chikrangkon dolgni dake suale, dolsako Me·gam gita ganat·chinate uamaangko Dingcheng, Basucheng aro Rong·dotpa A·chik dakgrikdiligiparang dakgriksusaa dakate roaha. Unomitingchachaosa Me·gamrang ba bobilrang sruk·sruk dakgrikramona napbae Me·gam dakgipa A·chik dol ning·o napsepe A·chikrangko dakgrikbebeaha. Jensalo uamaang A·chikrangko den·e·su·e so·otangengaha ine nikosa bobil napchongmotaha ine ui·e A·chikrangde kenjagoke nagra dokataha, aro songchi kobor on·china chingko watataha,” ine uamang sakgni aganaha.

Ia kattarangko knaen ua A·chik sakgnini ganenggipa Me·gam gandingrangko oke ra·rike, uamaangkode songchi kobor on·china Balseng watataha, aro indakeming ua an·tangan Me·gam gandingko gane Me·gam dake dakgrikramchina rang·san katjoljolbaaha. Dakgrikramona sokbaon Balseng bakbakan Me·gamrangni dolosa napeaha, aro indakeming Me·gam dakgipa A·chikrangko sandiaha. Unon A·chikrangba Balseng Me·gam dake dakjeesa Me·gam dolo napenga ine ui·aha. Indiba Balseng rang·san dakgrikramni jatchio chadenge jaktango songdoe pilaknan chrikwate indine aganaha; “Dakgrikanirang bilding·bildang ong·tokaha aro tol·e dakanirang bang·aha. Uni gimin da·o dakgrikaniko dontongkubo aro a·bachengtaibo. Dolsa A·chikrang Me·gam dake togiaha aro Me·gamranga cha·uesa dakgrikramona napbaaha. Angko niatbo, angaba dakgrikramo napena an·tango Me·gam dake dakjeenga.” Indine agane Balseng kosako gandapgipa Me·gam gandingrangko okgale galataha. Unikoa Me·gam gandingrangko gane Me·gam dakmikgipa pilak A·chikrangko dingtang tom·batokchina ge·ete uamangni gandapgipa Me·gam gandingrangkoba okgaltokchina aganaha. Unon A·chikrang a·damsano tom·batoke Me·gam gandingrangko okgale galattokaha. Indake dol gnini A·chikrangan

a·damdamsano tom·dake chimongahaon A·chik kotokrangko wekwakchipe bang·bee nikaha. Unosa A·chik dolni mande bang·aniko aro uamangni Me·gam dake dakjeani a·selrangko Me·gamrangde ui·paaha.

A·chikrang aro Me·gam dakgrikram a·bao mikkang chakgrike a·damtangtngko ra·e dakgrikna tarie dongtokaha. Unon Me·gamrangde gisiko kena napaha. Balseng dolgnini jatchiona re·bae unomitingon namgrike dakgrikgija songtangtangchi re·pilainaha ine janapaha. Me·gamrangni doloni gimikan uko namnikoba Me·gam Gonggrot·de uko namnikjaha, aro jeba ong·bo dakgriksrangnasa ua aganaha. Unikoa minggipin janapaniko Balseng agantaiaha: chongmotan dolgnian silchidarerangko gale jakrarachi dakrikna ine ua aganaha. Indiba ukoba Me·gam Gonggrot·an ra·chakjaha.

Unon silchidarechi dakgriksrangana agre minggipin chol dongjaha, aro uamang dakgriksrangna tarie krengaha. Rong·dotpa, Dingcheng aro Basucheng A·chik dakgrikdiligiparangkoba uamangna pakwatgimin a·damtangtangchi Balseng donataha. Unikoa adilrangko sikaton dolgnian bil·ting·bil·ting dakgrikanngtokaha. Aditani ja·mano A·chik dolrangan Me·gam dolrangkode sikbekangaha ba uamangko amangengaha. Bobilrangoni bang·an siangaha aro uamaang kenjagoke bilding·bildang ong·tokaha. Unomitingon Balsengde Doenang·ko rimbite niwattoa biapo dakgrikaniko niwatatengachim. Indakmitingo Me·gam Gonggrot·de rang·san chasinapbae Balseng·ko den·na ine mil·am bikan engaha. Indiba Balseng rang·san niksrapgija bilwengwate chakon Me·gam Gonggrot dal·gipade rimtimtim chikkipe ga·akangaha, aro uni mil·amba uni jakoni gobranga gita tang·angaha. Uni ga·akangani bakan Balseng Me·gam Gonggrot·ko asongjete uni knio rim·e skoko sikdekdekaha. Unon Doenang·ba rang·san chadrapemung Me·gam Gonggrot·ni jakrangko sakselsele pe·aha.

Unon pilak A·chik dakgrikdiligiparanga ka·dongbate Me·gamrangko chadrape dakgrikaha aro batsotram a·dokrangko Basucheng champengsoaha aro samtangtangchini bobilrangko Dingcheng aro Rong·dotpa changduulbaaha. Indaken pilak Me·gamrangkon A·chikrang changduule rim·gopaha. Unon Me·gamrang an·tangtangni silchidarerangko gobrake an·tangtangkon A·chikrangni jako on·kamaha. Indiba uamangni janggirangmangmangko so·otgija donpachina Me·gamrang A·chikrango mol·molaha. Me·gamrangni an·tangtangko on·kame kema bi·ako Balseng ra·chakaha aro uamangko so·otgija watataha, indiba uamangni silchidarerangko A·chikrangan kepe ra·rikaha.

Indiba ka·namgijagipa Me·gam Gonggrotkode karomtome, koksep nokmao chipe pante sakchet wa·pong kae songchina manggittang ripee ra·angaha. Bobilrangko amahani gimin inchroe A·chikrang walon bil·chamrangko nate jikjak·jikjak a·boke, Me·gam Gonggrotko koksepo chipe

ra·ange, songchina ruechinchin dake re·angtokaha. Songona sokangon uamang Me·gam Gonggrot·ko songni sara jatchio koksep nokmao chipako ongalwate doneaha. Uni sambao wal·tim jele sikaha. A·chik dakgrikkiparang songona sokangtokahaon, Balseng, Doenang, Dingcheng, Rong·dotpa aro Basuchengmangba rasonggragra jinmarangni jatchio ja·nengtakpaaha. Unon wilwila songgipinrangni pilak A·chikrang sokbatokani ja·mano bobilrangko dakgrikao cheani gimin uamang jatna rasong on·e gambe·e inchrotokaha.

Songgimiko chakpilgija bang·bea tom·bagipa manderang kusi ong·e cha·e·ringe roaha aro pante·nomilranga chrok·mesae roaha. Mitamranga Me·gam Gonggrot·ko nie uko kal·ak·sningjoljole ka·dinge roaha. Rong·dotpa, Dingcheng aro Basucheng·maangara wal·tim samo griksusae roaha. Songko·nokko dilgiparanga Balseng·ko pakkreo ripeeming uko chalang songaha. Buchumarangba noksamrango tom·dake A·chik ma·a·ambiko ring·e kore doke roaha, aro budeparanga sel·u achokrangko jakbite gaku·gaku dake pilak tamasarangko nie ropaaaha. Sonajing aro Norindik·ma·angba gipin nomilrang baksa jinmarangni jatchio ku·chimitunit ringreng·ringreng re·jimjee cha·gipa·ringgipa aro chrok·mesagipramgko nie roaha.

Unomiting chachao Wangdopa minggipa, ka·ting·rang·ting dakgipa saksa songoni me·apa jinmako nappretbae rang·san Me·gam Gonggrot·ko koksep nokmao chipako sel·uchi jaksamgni sinkinge su·eaha. Sel·uchi su·a uko oksiko nange uni bikma prake bibik naruruaha. Me·gam Gonggrot koksep be·chippile krenge niaha, indiba ja·ko·jakko kaani gimin koksep ning·o krengetojaha, aro indaken ua kokseponi jokna man·jaha. Indiba ua an·tangni bibik naruruako an·tangan siknapate ku·chichi studapaton skang gitan mnikjang dake uni mata paride nampilaijok, aro ua sijaha. Uko nike pilak songni manderang aiao inmane kena napaha, aro mai a·selni gimin Me·gam Gonggrot sijaha uko uamang u·ijaha. Uni gimin uni sigijani a·selko sandichina gita Balseng songni manderangko watpripraataha.

Dolsa sandigipa manderanga Dokrekpa aro Dingrepa ong·achim, aro uamanga sadusa nanga. Uamaang anti changsa songreangani ja·mano Song Me·chik Wadro song damsaona sokangaha. Ua songode me·chik segri randirarasa dongachim. Uamang sadusara Song Me·chik Wadro ingipako u·ipakujachim. Indaken Dokrekpa·maang ua songko ga·dapemangmangon ua songni me·chikrang chatimolbae uamang sadusakode sikdrae rimangaha aro uamang biltete nioba jokjaha. Indakesa uamang sadusa adita salrangna ua Song Me·chik Wadro songon dongangna ga·akaha. Salsao ua songni saksa buchuma Dadilma minggipa uamangna ka·sachake Dokrekpa·ko okamange uamanga banoni aro maina ua songona re·baaha ine uo sing·aha. Unon uamang Balsrigittim songoni aro Me·gam Gonggrot·ni sigijani a·selko sandichina watatani gimin songrebaesa ua songona sokbaaha ine Dokrekpa aganchakaha. Me·gam Gonggrot·ni janggi silchide uni ambitangni jakosa

aro uara nikrakgijagipa jo-ongrangosa aro uko siltok-timi ning-o chipe ambitanggipasa ua timiko ripok sike ganenga ine Dadilma Dokrekpa-na sriksrik agane on-aha. Me-gam Gonggrot-ni ambitanggipara grimra rong-kol ning-osa saksan dongari jadok tusia aro jadokna mikgraka aro ua rong-kol ku-mango chipu nokma dongpenga ineba Dadilma rongtale aganatsrangaha.

Ua kattarangko knae Dokrekpa aro Dingrepa sadusade wal seng-nasiachibara Song-Me-chik Wadro songko wate sruksruk Balsrigittim songchina katbapilaha, aro songona sokbae ua kattarangko Balsengna agane on-skaaha. Unon Balseng Doenang-ko rime Me-gam Gonggrot-ni ambitangko am-na Me-gamrangni songchi pringwalni re-chakatangaha. Uamang Dingram Gitok batange attam walsimsimo Me-gam songona sokangaha, indiba namedake walsrangkujani gimin andalkuchina aro ua buchumani dongramko am-ani cholrangko chanchichengna ine song kosakni rong-patalo uamang asonge neng-takaha. Unomitingchachao Me-gam nomil sakgni sarisa chigaoni chi-ko-e ua rong-patal samba gitan re-pakbaengachim, aro uamanga attam simsimo kena gisik ra-e golpo joljole re-baengachim. Ua Me-gam nomil sakgnide Balseng-maangni rong-patalo asongako nikatgijasa golpo ka-baengachim. “Ia rong-patalni sambao damsa grim rong-kol donga aro ua rong-kol ning-on Me-gam Gonggrot-ni ambitang uni janggi silchini timiko ripok dake gane dongenga, indiba ukode ramram nikjawa maina rong-kol ku-mango bolbok bolma chapenga aro uni ja-pango chipu nokma dongtima,” ine nomilrangoni saksa aganaha.

Ua Me-gam nomilrangni golpo ka-a kattarangko Balseng aro Doenang rongtalen knarikaha. Unon, adita waltinganon, Balseng aro Doenang rong-pataloni ong-one bil-cham so-e natange rong-kol ku-mangona ka-sine re-angaha. Uano bolbok bolma chapengako uamang nikbebeaha. Unon, bil-chamko rong-te kosako done Doenang-ko samdim grimo turomromate Balseng an-tangde mil-am ra-e bolbok ja-pango time dongaha. Dikdiksani ja-manon chipu nokma Doenang-chipakna ka-sine malbaaha. Unochacha Balseng mil-amchi jaksamgni krenge chipu nokmani gitokko den-tongataha. Chipu nokmade gitok chottome skorara ga-ake ku-gape siaijok, aro gong-gengenggipa jangtongni be-enkoba Balseng-an den-tongtonge uni skokode a-o dape galbaaha.

Unikoa Balseng aro Doenang grim rong-kol ningchi bil-cham nate napangaha. Adita napangon buchumani inggok ra-e tusipekengako uamang nikeaha. Unon Balseng buchumani gitoko janggi silchini timiko ripok dake ganenggipako rang-san ra-sote ra-bae uamaang sakgnian rong-kol ning-oni joljolbikbik ong-kate Balsrigittim songchina walon katbapilaha, aro seng-na skang songona sokbae uamang nokpantechi gadoangari tueaha. Pringosa nokpanteoni chakatbae, songni manderangko okamate sarao tom-dakataha.

Dingcheng, Basucheng, Rong-dotpa, Sonajing aro Norindik-maangba uamaang baksa apalgipa songni saraona tom-baaha.

Unon Balseng Me-gam Gonggrot-ni janggi silchini timiko jako de-dengdenge ra-e jinmana mesoke uko wal-gantong wal-kio angdingdinge niaha. Unon rang-san Me-gam Gonggrot-de koksep ning-o gogorenge krengaha, aro uni krengani gimin koksep be-chipe Gonggrot-de kokseponi tang-oke a-palosa romrom-mittal dake gogorengaiaha. Uko nike Me-gam Gonggrot-ni janggide ua timiosa donga ine pilakan ui-tokaha. Uni gimin, da-ode Me-gam Gonggrot-ko mai dakna sika ine Balseng songni me-apa dilgiparango sing-aha. “Uan pilaknin bobil ong-a, uni gimin uko da-on so-ote galsrangbo” ine Rong-dotpa, Dingcheng, Basucheng aro uamang baksa pilak songni me-aparangba chro-chro agantokaha. Unon Me-gam Gonggrot romrome Balseng-ona sokbae, uni ja-a sambao kabita gnanng jaksamgni chopjole an-tangko kema-ka-e so-otgija donpachina gita uo molmolbeaha. Balseng-ni gisikode una pil-sa gita ka-sachakani dongachim.

Unomitingon Sonajing rang-san jinma jatchiona re-bae, “Songni aparang, rajarang, anga iani gimin mingsa kattako agana ska: chongmotan, da-o Me-gam Gonggrot-ko songona ra-dobae so-ote galanide namjawakon maina dakgrike amode dakgrikram biapon uko so-ote galani ong-achim,” ine ua jinmana parake aganaha. Uni gimin ua an-tangan kema bi-e gisik pil-na ku-rachakode uko so-otgija kema ka-e gital janggi tangani cholko una on-na nanga ineba Sonajing agandapaha. Unon Doenang-ba rang-san chakate, uko kema ka-e so-otgija watode uni janggi silchini timiko sawa dongtimgen ine aganskaaha. Indiba, “Me-gam Gonggrot-ko kema ka-e watode uni janggi silchiko sakgipinni jako uko donna nangjawa, ong-jaode uko kema-ka-e watani namgni gri,” ine Sonajing aganatskaaha.

Sonajing-ni indakgipa kattarangko knaon songni me-aparangba an-tangtangan chanchie nie ong-nikaha aro ukon uamaangba ra-chakaha. Uni gimin Me-gam Gonggrot-ni ja-a-jakrango kaarangko enge wataha. Unon Me-gam Gonggrot Balseng-ona re-bae uni ja-a sambao ga-ake jak-chopjole uko olakkiaha, aro an-tangko kema-ka-e A-chikrangni nokkol dake so-otgija donpachina ua mol-molaha. Mikkang salrangoba A-chikrang baksa ripeng ong-e donganggnok ineba ua ku-mikchete aganaha. Unikoa Me-gam Gonggrot tom-bagipa songni me-aparangkoba jinmachina mikkange salam ka-ataha, aro A-chikrangba uko ra-chakani gita Gonggrot-ko salam ka-etokaha.

Unikoa uamangni nangrimgrikaniko damsan tom-dake mesokna gita pilak Me-gamrangkoba Balsrigittim songona re-batokchina Balseng manderangko watate okamataha. Manchia sal sokon uamaangba re-batokaaha. “An-ching-A-chikrang aro Me-gamrang-bobil ong-grikahaoba, da-o an-ching

kema-ka·grike nangrimgrike mikkangchi dongangnaha, maina chinga A·chikrangba Me·gam Gonggrot-ko so·otgija uko kema ka·e wataha aro uni janggi silchi timikoba unan on·atpilgnok,” ine jinma jatchio chadenge Balseng Me·gamrangna aganprakaha. “Uan ong·chongmota. A·chikrang angko so·otode man·gnokchim, indiba uamang angko kema-ka·e wataha, uni gimin an·chingba A·chikrang baksa da·ontal nangrimgrike dongnaha hai, angni Me·gam ripengrang,” ine Me·gam Gonggrot-ba Me·gamskarangna aganaha. Unon tom·bagipa pilak Me·gamrangba uko kusi ong·e namnike ra·chakaha.

Uandake Me·gamrang aro A·chikrang dol gnian kusi ong·e nangrimgrikaniko dakaha aro ua salko dal·nike gisik ra·na gita Balseng aro Sonajing-ko unon bia·ka·atna songoni me·chikmarang chanchidilaha aro uko pilakan namnike ra·chakaha. Unon Balseng-ko songni pante jinma Sonajing-maang nokchina sale ra·ange bia·ka·atna asongataha. Unomiting Doenang-koba panterang aro Norindik-koa nomilskarang Sonajing-maang baksa damsan bia·ka·atna ine Sonajing-maang nokchina saldrabatokaha. Indake un salo Balseng aro Sonajingko aro Doenang aro Norindik-ko – chong·motan jora gni apsan biapo bia·ka·atgipa kamal sakginini jakchi A·chik pagitchamni bewalo bia·ka·ataha.

Songni gisepo durubolni noko nagrako dokaton pilak manderangan sarao tom·bachimongtaiaha. Balseng aro Sonajing, Doenang aro Norindik-maangba bia·ka·mane saraona ong·katbajok. Me·gam Gonggrot-ba ua bia·ka·mangimin jora gniko salam ka·e pattiataha. Da·o Me·gamrang A·chikrang baksa nangrimgriktaiaha aro Balseng aro Sonajing-maangba bia·ka·manaha. Uni gimin A·chikrang aro Me·gamrang dol gnian namen katchatokbeaha aro kusi ong·an gape chrok-mesae, cha·e·ring·e roaha. Balseng, Doenang, Sonajing aro Norindik-maangba chrok-mesadilaha aro jinmako kusi ong·dilaha. Uamang baksa songni pilak pante-nomilrangba chrokanpajok, aro Me·gam Gonggrot-ba del·dim·del·dim dake uamaangni mikkang mikkang grike roaha. Dingcheng aro Basucheng – matgrikrang sakgnitangtang griksusae roaha aro Rong·dotpa-ra adilrangko siktimaha. Songni budepa-buchumarangba chrokna man·pajaoba gol·dik su·chane gaku-gaku dake noksamrango nitime ropaaaha.

Uandake walsa-salsa wak-matchu, merong-mechu dandak dandak cha·e·ring·e, chrok-mesae rochimaha. Cha·na bon·chakgija cha·tokaijok, ringna bon·chakgija ringtokaijok. Unon okkagiprangba romromaijok aro pegkiparangba gititokaijok. Pring seng·o Balseng nokdecholo niwaton chu-peke sarao tusichipgiparangko dakgrikram biapo sigimin manggisirang gitasa nikataiahachim. Peka namkalgiparangde wa·kaprangko dokaton simak-mikgrakbaaha, indiba agre pegkiparangde mamungkoba ui·gija sari gri gita tusiangaiaha. Uni gimin Doenang agre pegkiparangko morekreke demesaaha aro indakoba mikgrakgijagiparangkode mikkangrango do·kisnal nongtoke

jinmarangko ka·dingataha. Indake pekgipa me·chikrangkoa Sonajing-mung Norindik demesaaha, aro de·mesaoba mikgrakgijagiparangkode uamangba mikkangrango dim·ak toke ba nonge jinmarangko ka·dingataha.

Uandake de·mesae tusichipgiparangko chakatatmano uamang jinmarang baksa pilakan damsan mepring cha·tokaha. Uni ja·mano Me·gamrangde A·chikrangko mitel-mitchue songtangchina re·pilangtokaha. Me·gam Gonggrot-ba Balsengona re·bae grapjoljole uko salam ka·e Me·gamrang baksa damsan songchi re·pilangpaaha. Uni janggi-silchiko dongipa timiko Balseng Me·gam Gonggrot-nan, uni jakon on·atpilaha aro ua uko an·tang kang·kareo ganbite ra·angaha.

Me·gamrang uandake re·ange, Dingram Gitok a·dokona sokange uano rong·patal kosako mesal cha·e neng·takangaha. Unomitingo Me·gam Gonggrot-de saksantangtang auna ine chikol wari tu·achi ong·onangaha aro an·tangni gankapgipa timiko rong·te kosako done aue roaha. Unon Me·gamrangoni saksa rong·ma dandake dongipa kosako gakate roe rong·te ga·ringrengmane rong·ma dal·dalgipa gimikon ga·akruruattokaha, aro ua an·tangba chikol ka·machi ga·akange aro rong·terangba ga·akdape siaha. Chikol ka·machi aue roenggipa Me·gam Gonggrot-ba rong·ma-rong·te ga·akdape sko brete siaha, aro uni janggi silchini timiba rong·tesako donara rong·te ga·akdape kining ripik dokpreta gita be·kningaha. Unon Me·gamrang duk ong·beesa songtangchi re·pilangaha.

Me·gamrangni songtangchina re·pilangani ja·mano songgipinrangoni re·bagipa A·chikrangba gam·bee inchroe ruechinchin dake songtangtangchi Balsrigittim-oni re·pilangtokaha. Uamaangni re·angmano Balsrigittim songde chi·indikdik dakaijok. Indiba Balseng aro Sonajing gamchatgipa ripok dokatchi gita songo ching·chetrikaha.

Aditani ja·mano Sonajing-de Balseng-ko nokchina rimangengachim, indiba Balsrigittim songni pante aro nomilrang uamangko nokchi re·angna watkujaengachim. Indaken Sonajing-koa panterang aro Balseng-koa nomilrang champenge pante-me·trani salrangko bon·kame gisik ra·atna ine uamang rodilkuaha. Doenang-ba nomilrangmung aro Norindik-ba panterangmungsa gogai-gonda doke uamangko rodilaha. Uamang pante-me·trani salrangko inditan knatobee gonda doke rodilaha je Balseng aro Sonajing uarangko ka·pak-ka·pak chanchiate grapmanpilaha. Unon nomilranga Balseng-ko aro panteranga Sonajing-ko ka·dimeatani kattarangko agane uamangni mikchirangko ipakattokaha. Indake kusini mikchirang aro ka·pakani gisikrang baksa pante-nomilrangko watange, Balseng aro Sonajing jikse ong·e nokchi re·angna ekgrikangaha.

Unon adita waltingaha, aro songni pilak manderangba noktangtangchi re·angtokaha. Uamangni re·angani ja·mano songni me·chikma sakgni

wal·timo asonge golpo ka·e rorikaha. Uamanga Rong·dotma aro Dingrema·ma·ang ong·achim. Uamang Balseng aro Sonajing·ni namnamgipa gunrangni gimin agangrike ma·rap·ma·rap katta ring·e roaha. Dingrema Balseng·ko de·saa nanga aro Rang·dotmara Sonajing·ko de·saa nangachim. Rong·dotma Balseng·ko uni gisik seng·ani aro bil·bilakni gimin rasong chae aganaha indiba Dingrema·ra uni a·selde Sonajing·ni gun·gisik gnangani aro kakket ka·saani giminsa ong·a ine aganskaaha. Mandeni kam, gisik, bil aro pilak chu·sokanirangba ronggrikgipa ka·saani bilchisa ong·na man·a ine ua aganaha. Indaken Rong·dotma aro Dingrema sarisa, an·tangtangan a·gilsaknirangni gimin namedake ma·sie rokom·rokom ka·sagrikarangni giminba uamaang agangrikaha. Jik·seni ka·saanian a·sako dal·batgipa ka·saani ong·a aro uan rakbatgipa ka·saani kamba ong·a ine uamang agangrikaha. Dingtang dingtang ka·saanirang gnang indiba uarang gimikan jik·seni ka·saanionisa ong·baa. Mande gisik seng·beoba jik·se ra·na ka·saaniode seng·gipa ong·na man·ja, indiba manderangde uko ramram gita nikaia, ba dal·batgipa ong·a ine ui·oba badiaba mingsasiksikode an·tangtangan kana ong·a ga·akaia. Uni nambatgipa gun aro ronggrikgipa ka·saaniko daksningpachina gita Sonajing·ko dingtangmancha atchiataha ineba uamang rasong chae agangrikaha.

Iarangko ning·tue chanchie agangriken Rong·dotma aro Dingrema waljatchi batpiloba tusinappiljaha, indiba seng·nasiachibara uamang sarisa wal·timo asongari dan·dangrike tusichipangaha. Aro unon do·o paksa gisikani ja·mano salaramoni pringprang aski rongs teng·suaha.

KI-TAPKO SEGIPANI JANGGI TANGANIKO KAN-DIKE SEGIMIN

*donggipa Amjonga
songo*



Barendra S. Bangshall Assamni ning-o 1923 bilsio atchiaha. Uni pagipako Janiram D. Areng aro ma-gipako Sombani B. Sangma mingachim. Sombani B. Sangma Pokira W. Momin, jean Rev. Ramke W. Momin ni jonggipa ong-achim, uni demechik ong-skaachim. Baren Bangshall Sangma ni pagipa primary skulni skigipa ong-achim aro ua an-tangan kim-kimgipa Christian saksa ong-e uni dedrangna toromo aro songsaro name janggi tangna skirongaha.

B S. Bangshall primary skulko 1935 bilsio matchotaha. Ua 1936 bilsio scholarshipko middle skul-o poraina gita man-paaha. Ua middle skulko namen nambee pass ka-enba mikkangchi poraiangdapkuna gita scholarshipko man-taiaha.

B S. Bangshall 1940 bilsio Jorhat Christian Boys' High School-o poraina re-angaha. Ua poraimitingo namen rakbee tikkelnangaha maina uni man-pagipa Rs.10/- scholarshippara unomiting somoiomangba uni poraia-onanganirangnamangba chu-ongpajachim. Indaken ua dongkalgipa cha-kalgipa nokdangrango kam ka-nape an-tangni poraianina cholko dakaha. 1941 bilsio ua be-en an-sengjani gimin Jorhatoni re-bapile Shillong Boys' High School-ona rebaskaaha. Ua uni Matric porikkako 1944 bilsio 2nd div. o pass ka-aha. Matric pass ka-ani ja-mano ua Turaona re-bae clerk-ni kamko D.C office-o 1st Oct. 1945 bilsio ka-na a-bachengaha. 1973 bilsio ua Head Asst.-ona ra-doatako man-e Williamnagar Sub division ona watatako man-aha. Uni ja-mano Baghmara sub division-onaba 1977 bilsimango transfer ong-angtaiaha. Adita bilsirangni ja-mano ua Williamnagar-onan watattaipilako man-aha aro uno ka-engmitingon 1984 bilsio kamoni neng-takaha.

B S. Bangshall Sunilla G. Mominko 5th August 1946-o bia ka-aha. Uamangna Nokgipa depante sakbonga aro demechik sakgittamko pattiaha. B S. Bangshall chonmitingonin noksa salna gisik nangbegipa aro changgipa ong-achim. Uni Nishangram-o poraimitingo ua King George V ni noksako salaha aro ua noksako skulni office-o donachim. Salsao Goalparani Magistrate skul nina re-bae ua noksako nikaha aro namen noksako namnikbeaha aro indaken ua Barena Rs.10/- ko boksisk dake on-aha. 1955 bilsio ba ua Garo-Hillsni mapko oil painting dakaha jekon exhibitiono mesokaha aro unaba ua boksisko man-aha. Ua "A-chik Ku-rang" magazine ni cover-na Sonaram R. Sangma aro Howard Dennison Momin-ni noksakoba salaha. Uandake ua bang-a A-chikkuo segipa ki-taprangna talatdapani noksarangko salaha.

Photographyba mingsa uni namnikgipa hobby ong·achim. Uo bang·a gitcam camerarang dongachim jerangan da·ode ‘antique piece’ ong·aijok. Uni jakkalgitcam camerarangni dam·ara Rs.2/- dakgipa oni intalan donga. Ua photo ka·aniko namen gisik nange dakachim aro ua kamo namen kusiniko man·achim. Unomiting somoirango Turao photo ka·na changgiparang namen komibeachim . Uni kamoni neng·takani ja·mano ua uni photographyko chu·gimik somoi ra·e a·bachengtaiaha, aro nokon studioko kulie uko “Ranggira Studio” mingaha.

Ua mikcha·ka·sagrikan i golporang, ma·gitcam·pagitchamrangni golporang, dakmesokani golporang, kan·dikgipa dakmesokani aro poedorangko seaha. Uni see donanggimin poedorangko 2008 bilsio ‘Angni Ring·anirang’ ine ki·tap kingsao man·gope chapa ka·ataha. ‘Angni Ring·anirang’ ine mingani miksonganiara, uni poedorangoni bang·batanan ua sulko bikotaha ba badiaba sulrangna ma·keate seani gimin uarangko git gitaba jakkalna man·achim. Ua Garo Literature Society ko rikdiligiparagoniba saksa ong·achim aro uko tange rakkina rakbeen kamko ka·angaha. Baren aro Meckenson Rongmitu an·tangtangni man·a gita “A·chik Ku·rang” magazine ko tangatpilna jotton ka·e kamko ka·aha. Ring·ani aro doka·dam·aniba mingsa uni namnikgipa somoi re·atani chol ong·achim. Jekon uni depanterang uoniko man·rikaha.

B S. Bangshall uni bon·kamgipa salrangko sea·jotanio aro photogra·phy·o re·ataha. 1988 bilsini November 18 tariko Garo Literature Society “Seminar on Garo Literature” ko ong·ataha aro ua tom·aniona ua Guest of Honour dake okamako man·aha. Ua, ua tom·anio talatdapanirang aro agandapanirango bak ra·paaha aro ‘Guest of Honour’ ong·e ua Garo Language & Literature ni namdaprorobaani aro silrorobaani bidingo agananiko dakengmitingo ua rang·san blood pressure stroke ong·e ga·akaha aro uko mikselgijako Christian hospitalona ra·ange sananiko dakaha indiba mikselchipjaha, indaken sal chikkungni ja·mano ua 1988 ni November 27 tariko ia a·gilsakko watangaha. Uni a·gilsakko watanganiara A·chik jatna dal·a gimaani ong·genchimoba uni donanggimin sea·jotaniirang aro gamchatgipa kamrang jatna daksningani aro skie ra·ani ong·angskachina; jechin pangnan uni bimungko tange rakkigen.

Published by Mrs. Sunilla G. Momin
Bonepa Atilla, Tura